

光緒山西通志

名宦錄八

錄一之八

山西通志弟一百八

賜進士出身頭品頂戴兵部侍郎兼都察院右副都御史巡撫山西提督軍務張煦奉旨監修

守令 明嘉靖至崇禎

於惟一懷甯人嘉靖間以進士任太原府知府初下車會歲比不登民多流亡卽爲繪圖上請不待報可徑發倉廩振之後擢陝西副使去之日送者塞路祀名宦

張祉固始人進士太原知府愷悌慈仁數遇水旱躬爲祈禱敵騎入犯士民惶恐內徙祉冒雨登陴晝夜巡警累官陝西巡撫祀名宦

黃卿益都人進士太原知府博學有操行重農桑崇學校慎刑獄黃土寨大水漂沒居民以千計掩骸賑恤不遺餘力民

舍火將延及學宮泣拜禱風反火熄在任六年擢浙江參政  
後累官江西布政使祀名宦

馮友陝西長安人嘉靖間以舉人任岢嵐州知州岢嵐數遭  
兵患歲比不登友相視高下肥瘠教以耕作又時厯田間爲  
言慈孝使知敦行誼成禮俗尋調忻州忻三歲三易守稱難  
治友馭以威嚴訟師一夕盡徙去中丞上其治行後擢保定  
同知祀名宦

張稽古陝西蒲城舉人岢嵐州知州諷直不畏強禦嘗按都  
御史楊順誣殺沈練事卒擬以法順繫獄死後厯本省按察  
使晉藩常侍欲以事干之固請遊別墅終弗許次日以盛饌  
來餽悉委棄溝壑中還其器其剛介如此祀名宦

宋橘漢州人嘉靖九年以舉人任徐溝縣知縣雅意愛民興

舉悉當飛蝗蔽天獨不入其境內祀名宦

俞鸞字應和陝西靈州守禦所人以進士任榆次縣知縣精明有操守爲政寬猛互濟稱能吏祀名宦

王一民東明人舉人任文水令清節自持政平不擾築城垣建各鄉堡若干座後以誣劾掛冠去人共惜之

鄭鎬河南安陽舉人任交城縣剛直有爲修葺學校城池公署倉庾之敝壞者又於城之四面及南路植柳成林會歲饑人賴之以濟後擢安州知州致仕去祀名宦

王宮用字近臣直隸成安人進士知榆次縣前令率尙操切宮用獨馭以寬和訟平賦清事成就理邑稅歲千金多中飽宮用盡以報藩司無所染政暇輒進諸生教以立身行己之要尋以憂去後仕至太僕寺卿祀名宦

劉宏化湖廣長沙人進士令交城有吏材居官以廉能著未  
浹期政教大行尋調安邑累官尙寶卿祀名宦

蕭大亨字夏卿山東泰安人進士令榆次性端嚴持大體不  
務赫赫聲而諸所厝注士民咸食其利後總督宣大視榆人  
爲故赤子撫恤尤摯嘗以關城卑薄爲贅其四面榆人立石  
記之祀名宦

薛煥魏縣人任文水立政平易綜理詳密完逋賦均徭役誣  
訟風息吏畏民懷其清約勤慎始終不渝

王楫新泰人任太谷嚴明不苟豪猾斂跡政平訟簡庭無私  
謁雅意愛士貧者多方振濟歸田行李蕭然父老傳頌之

崔三畏蠡縣進士任太谷有惠政民有犯先諭以義理而後  
治之未嘗任情以盡法尤注意於學校後徵於朝士民遮道

泣留厯官四川參政

金礪字霜鐔河南西華人以進士任太原縣知縣仁明能悉民隱舊造夏秋赤厯里書索費不貲計事給食歲省五百餘金水利歲久壅淤相其高下開新渠四十餘道溉田數百頃邵姚等都逃亡者過半給以籽種緩其徭役復業者千餘家又以學校爲育材地躬校閱振貧乏鼓舞備至而泣任之初卽製戎器火具若干簡閱訓練爲百年計後遇敵竟以有備得免其經理詳密皆類此尋調汾陽父老爭走部乞留已復調陽曲涕泣攀臥車累日不得發陽城賈贈有文記之

張承惠易州舉人任太谷性嚴毅人不敢干以私爲政務持大體不事微察抑侵漁杜奸弊治豪強民賴以安尤加意於學校每朔望視學召諸生親授講說一時文行丕變以觀事

卒於京士民爲之遙奠哀泣

劉奎耀東鹿舉人太谷知縣性嚴重爲政雅尙寬平民畏愛之如父母祀名宦

王允言容城舉人任祁縣負清操有明敏才撫民以惠衙齋市懸胥屏息嘗遇兵患督吏民捍禦閭井獲安祀名宦

張崇德咸陽人以貢任嵐縣知縣政教修明嘗遇邊警躬督吏民禦之比退復增修城池民建祠祀焉

劉濬德平人嵐縣知縣剛毅廉介豪猾斂迹祀名宦

聶豹字文蔚吉安永豐人正德十二年進士嘉靖中爲平陽知府時山西頻中寇民無甯居豹令富民出錢罪疑者贖得萬餘金修靈石郭家溝冷泉諸關隘練鄉勇六千守之寇來犯被卻廷議以豹爲知兵給事中劉繪大學士嚴嵩皆薦之

擢潼關備兵副使言官論豹在平陽乾沒大學士夏言惡豹遂落職後以徐階薦擢兵部左侍郎

毛愷浙江進士知平陽府懲奸剔弊吏畏如神旋升本省參政累官刑官尙書謚端簡

蔣陽安樂縣人以進士知吉州崇學校築城垣稱良牧焉升陝西僉事

王利山東陽信人嘉靖三年以舉人任翼城縣知縣廉正有執守初下車卽捕數大猾置于法每涖民威嚴若神凜不可犯而慈惠通達于閭里利害無不周悉厝注咸中肯綮擢工部郎中祀名宦

楚書甯夏進士曲沃知縣果毅有偉度長於應變撫小弱治豪猾吏畏民服尋擢兵部主事大同兵變單騎往定之累官



都御史祀名宦

王庚灤州進士襄陵知縣仁厚愷悌凡所施設雅稱廉平累官左布政祀名宦

岳倫淮安衛人以進士令曲沃先任行人有直聲及改縣以寬撫民以嚴馭吏嘗念賦役日煩申免代納銀兩三分之二後大同兵變再疏言兵事厯官郎中以諫死祀名宦

何思雄縣進士任襄陵縣年甚少撫民造士雖練達老成無以過已有巨憝廉得之立寘諸法豪貴屏息良善獲安累官都御史祀名宦

趙統臨潼人進士知臨汾縣性素剛直請託饋遺胥絕豁里書飛詭之積弊免闔邑荒地之徵輸嚴惰農之禁立社倉之法流遺復業者千餘家作社學修文廟復辦正祭器課訓生

徒善政甚多後擢知蒲州邑人立遺愛碑

晉如思陝西三原人進士在洪洞縣練達吏事爲政以嚴勝發奸摘伏時稱神君邑有凶悍橫肆爲人害立剪鋤之祀名宦

高節陝西咸陽人進士任襄陵縣性廉潔嚴于嫉惡有犯者必痛治之而體悉民瘼以慈祥著嘗爲省里甲均賦役公庭累月絕敲朴聲累官河南知府祀名宦

劉光達杞縣進士知翼城縣性儉樸翼故有代辦差銀爲累力請上官得免五百餘兩民獲少蘇累官苑馬少卿祀名宦陰秉陽汲縣進士任曲沃縣知縣立社倉勸民積穀出所著讀書鈔授諸生使知體用之學尋擢御史祀名宦

張學顏字子愚直隸肥鄉人進士知曲沃縣尙嚴明而不至

暴號當地震後城池公署傾圮略盡竭力營繕不一科諸里  
甲故大役煩興而民不病後擢工科給事中累官戶部尙書  
劉孝河南安陽人進士曲沃知縣惇厚不喜爲刻覈地震後  
瘡痍未起益崇寬大與民休息而于奸黠者則痛繩以法不  
少恕祀名宦

單訥直隸棗強人進士翼城知縣視事勤敏剖決獄訟無留  
滯嘗請蠲代辦銀兩朔望謁聖畢卽爲諸生講修己正人之  
道丞某嘗以帑羨金進叱之病篤邑參議劉志助以木不受  
及卒士民流涕祀名宦

張國彥直隸邯鄲人進士襄陵縣知縣廉重持大體以科條  
正民俗以忠孝振士習嘗遇旱步禱數十里至龍祠父老憫  
其勞國彥曰一身何足恤獨吾民荒歉可念耳擢兵科給事

中民立祠祀之

耿儒陝西武功人以舉人在太平縣剛介習事爲政以明察著捕盜有法胥聞風遠徙嘗增學校砌城堞壇壝橋梁以次修舉擢廣平通判祀名宦

羅潮直隸三河人以舉人在太平縣雅意愛民謂閭井未安皆供億爲累按經制力裁其冗濫者遠邇霑澤擢磁州知州祀名宦

宋之韓武安人任襄陵才猷迥異器宇淵宏墾田均徭政清訟理市廛不擾俗易風移蓋能吏云

周冕貴州人岳陽知縣通敏能斷案無留牘祀名宦

李應奇陝西鎮原人以進士令岳陽慈仁不苟凡所興除悉中利弊民歌其惠祀名宦

劉魯生恩縣進士任曲沃洩事勤敏政多撫字初終罔倦始作邑乘以備文獻行取御史

郭庭梧字子材新鄉進士任曲沃刑清政舉吏民畏服二驛衝要歲費不貲以站銀羨餘賃僱歲省數千金沃代吉永徭歲若干極力論辯歸之民始甦歲飢捐俸振濟存活甚眾修濬城池節力時使民不知勞升監察御史歷官府丞

張佳允字肖甫四川銅梁人由進士以禮部郎中謫河南陳州同知嘉靖四十一年升知蒲州時地震未久賦不時供委曲拊循而國賦亦不廢工詩善書所歷名勝題詠殆遍升潁川道河南僉使歷官兵部尚書謚襄憲

王大節直隸大名人嘉靖元年以舉人任萬泉縣知縣性嚴明豪猾畏服民得樂業邑西門外土橋歲久傾圯易之以石

因名永利又修更西之永安長橋迄今稱便

張讓山東諸城人進士榮河知縣清直不與時諧因解組歸士民涕泣遮留後官南太僕寺丞祀名宦

孫恪信陽舉人任臨晉縣清癯美容儀爲人豈弟慈祥值歲旱齋戒步禱家人恐其羸止之弗聽澍雨遍境內尋以疾卒張舜臣章邱進士任臨晉縣儀容修整揚休山立與人言笑不苟勸勵學校刊輯縣志擢吏部主事累遷戶部尙書

邢綸南鄭舉人任猗氏縣仁慈有清操善折獄不喜鈎距而悉得其情間徵贖鍰輒貯倉庾中值凶荒卽用以振救優禮文士扶持誘掖俾克成立後五十年猶得稱善地者皆綸力也累官柳州知府

范文原直隸定興人以選貢任萬泉縣冰蘖自矢遇所當爲

則毅然不撓營修背城以固疆圉平街道以利往來雅善形家言於北門外建文昌廟復於廟東北建臺護之今稱范公臺擢永平府同知

侯祁鄆城人令滎河承地震後能經理籌畫選兵飭武禁暴安民一切營繕修復如制且以興文爲已任建太甯書院設師儒其中時親誨之

齊君問偃師人令猗氏爲政以德讓風厲尤雅意古文公餘輒親出郊規度田畝品格山原以爲催徵緩急豪猾無所容其奸

侯有功號風山浮梁進士嘉靖初知潞州治尙嚴明法行自近而于閭左細民則寬以字之復選擇才俊督令讀書政暇親加品題所甄許無不擢高第者好微行屬吏凜凜奉法郡

境肅然

宋圭新城人嘉靖間以進士知潞安府性寬平復能諳練庶務設府之始凡所經畫必協人性合理俗上下宜之後升徐州道以去

賈應春正定人進士知潞安府器宏才練弛張協宜剖決如流豪右畏若神明

張嘉孚號立菴陝西安定人嘉靖間以進士任長治縣明敏善斷遇訟者給片紙令自拘到案隨剖其曲直不數言輒得其情復爲善言解之不數用鞭朴少頃兩造各得意去呼續至者入復如前後升戶部主事祀名宦

辛應乾安邱進士知壺關縣德量寬洪頽廢修舉著牧羊說升主事



李用敬山東益都人進士知壺關縣性簡易不尙刻覈遇訟獄以片辭決之有未服聽其言頗直悉心推鞠不曲徇已見翻然改從無難色質成之下皆以爲無冤後入爲給事中累官至通政使祀名宦

尹梁晉州人進士知長子縣性坦率與百姓若家人父子自奉甚菲寒一褐暑一布而已升戶部主事祀名宦

張煥益都人進士知長治縣言訥行果外剛內慈洞悉閭閻疾苦眞心撫字左右近習讒慝不得行冰蘖之操始終不渝升給事中

李淳濮州人進士知潞城縣嚴明慈惠民有青天慈母之謠升主事

王維垣直隸武清人進士知潞城縣值陳卿變官軍失利欲

屠邑維垣力請於上乃止而招脅從安反側其功爲尤多升主事

徐元道陝西秦州人知平順縣寬厚恤民有智略能任事時初設縣治悉心經畫城池廟社數年規模始定致政去

張汝乾雒南人知屯留縣邑有金龍池禱雨輒驗汝乾至屢禱弗應因命濬池得伏尸曰此冤鬼也祈夢於神神曰李姓弟殺兄也詰朝訪村民李逢奇因謀產殺兄逢春已三年矣一鞠而服是夕大雨

董遂河南嵩縣人進士知襄垣縣邑有乘暗殺人者密察得其人置之法人稱神明性至孝聞母病徑棄官歸監司素重其人便令還任母病愈始就道徵拜給事中歷本省副使段錦山東恩縣人進士知壺關縣嚴毅有威望臨民以莊嘗

規人情土俗爲科條揭通衢宿猾巨奸咸懾伏後擢御史累  
官布政使參議

薛騰蛟陝西渭南人進士知長治縣時縣新設制度未備蚤  
夜殫思多所裁定飭章程節里甲抑強扶弱崇禮勵俗務與  
民休息而馭吏胥則甚嚴不少貸焉升主事祀名宦

丁維甯字少濱山東諸城人進士知長治縣縣宜桑人多以  
紬爲業往時上官來取差役需索無已民甚病之維甯獨力  
爲裁抑不少徇徵拜御史官至湖廣副使

楊良臣卽墨人以舉人知黎城縣政尙平易勸農興學有實  
政單騎三撫青羊巨寇旨褒忠勤可嘉擢太原府通判

葛縉昌邑人進士知襄垣縣政教嚴明民安盜息仕至本省  
巡撫

郭鑑陝西咸甯人嘉靖二年以舉人授汾州知州深沈有志操砥礪廉隅明習法令政暇引諸生與上下其議論聞者興起尋擢戶部員外郎累官布政司左參議

劉坤壽張人由萬安縣擢知汾州廉靜簡明民忻忻望治齊宗堯直隸昌黎人嘉靖末以選貢任汾州知州忠直有膽略遇事慷慨直前隆慶丁卯北敵入寇抵城下宗堯登埤設守具指授捍禦方略卒得保全加銜河東運司同知仍管汾州事尋調忻州

李昇以舉人知石州勸農桑重教化旌節義去之日百姓皆感泣

王仁鏊屋人任石樓縣安集流離歲荒振濟恤民任事勤慎廉明政蹟彰著

王錦曲周舉人知孝義縣因母言乘肩輿勞民遂乘馬斥輿不復御與民平易有古人風每延禮諸生講論亶亶

侯嘉晏徽州舉人石樓知縣御民以寬不事敲朴民胥安之嘗爲歌稱其儉約廉仁能福庶斯民後擢河南府通判

脫鎬新河舉人知臨縣勤敏慈仁繕城修隄賑荒編甲減徭役其茂績尤在遷建學宮開多士文明之盛

李光米脂人知石樓縣民歌曰石樓李侯庶績克修民安政舉四境無憂

劉紹恤浙江人進士知石樓縣寬徭賦以遂羣生勤督課以成多士

張軾知甯鄉縣居官清謹事母以誠孝聞每公餘輒詣席跪問安否及母卒扶柩歸葬廬墓踰年卒

任大伯華陰舉人知臨縣慎以持已仁以愛民勤以立政未幾改調士民深感立去思碑

賀國定獲嘉舉人知臨縣剛方持已清白敢言治邑如家愛民如子升徽州知州有去思碑

王三益永城舉人知石樓縣刑清政簡育才愛民

陳情深州舉人知孝義縣操守甚堅時有邊警竭力捍禦卒保無虞修繕塼城百世永賴

王朝雍朝邑舉人嘉靖中以嚴州推官擢知澤州存心寬厚政理訟平歷三載人蒙其惠適巨寇陳卿據青羊山詣賊中諭以禍福順逆之理賊眾屈服後竟勦平之百姓安堵擢懷慶府同知

王進賢德州舉人知沁水縣才識疏暢迴有風力吏畏其威

民樂依賴居二載以憂旱疾作卒遠近悲號立祠端氏鎮祀之

王準儀衛司人進士知高平縣竭不急之務緩無名之徵扶植寡弱救民疾苦嚴禁侵漁豪右歛手三年以治行內徵去之日囊無餘貲

張由儀封人進士知高平縣性明敏案無留牘邑無冤民敷政三載百廢俱舉所立堂規至今猶爲遵守升給事中民立祠祀之

楊縉壽張人進士知翼城縣調陽城廉節自持寡交接政尙平易緩催科而勤撫字有古循良風

王傳高陵人進士知陽城縣沈靜寡言望之如神明雅愛士類校課悉有程積數萬石凶歲民賴以濟居四年未嘗輕

取一介民歌頌之

孫紹先萊陽人以貢知陵川縣剛明正直鋤強剔弊敷教造士節愛宜民有生祠德政碑

李麒涇州舉人知陵川縣平易近民寬猛得宜勸農桑振飢乏人咸德之

劉廷儀慈溪人嘉靖間以進士知陵川縣公廉強毅不畏權勢泣政恩威並著捕盜均賦興學造士具有成績而自奉儉約飲食澹若寒素升監察御史

楊總錦衣衛人嘉靖間知大同府方正自持輕徭薄賦餽遺一無所受有懸魚之風

王誥西平人知大同府寬大精明屬託不行貨財不染未幾以憂去隨升湖廣參政民甚思之



廉汝爲城固人進士知應州守正不阿奉法惟勤革數十年  
夙弊州賦立清

郭從道徽州舉人知應州荒蕪多所開墾逃移聞風來歸祀  
名宦

馬呈書廣平舉人任大同縣知縣饒才華善剖決民以訟至  
者立判之稱神君秩滿擢本府同知會議款貢呈書多所擘  
畫督府倚重入爲郎中尋復出知大同府鎮撫有方尤加意  
學校三雲戎馬閒絃誦時聞擢運司致政歸

桂林石埭人知廣靈縣蠲煩滌苛一意蘇息每秋多方儲積  
及春以貸貧不能耕者去之日百姓泣涕攀留不忍舍

許光宗乾州舉人知山陰縣築隄捍水修增城垣督課諸生  
撫恤百姓頗多善政

王一鳴齊東舉人知馬邑縣性溫厚政尙寬和訓生徒以振士風開河渠以固城郭士民賴之

張纂新鄉人嘉靖間以舉人知遼州玉潔冰清愛民如子去之日老幼莫不悲歎

梁如京薊州舉人知榆社縣一清如水發摘如神以憂去行李蕭然

高思敬陝西舉人知和順縣清廉仁愛有循吏風祀名宦  
楊魁儀封舉人知和順縣持身清介行行政仁慈士民稱頌祀名宦

劉漢完縣舉人知榆社縣性耿介門無私謁風教所被民雖貧不甘爲盜尤加惠庠序士勃然興起祀名宦

康朴長安舉人知榆社縣丰采溫和襟懷慈惠勸農興學薄

敘省刑民立祠祀之

董槃涉縣人知榆社縣負揮霍才復勵精爲治流賊犯境守禦有方卒保無虞

劉遷高陵人嘉靖中由舉人任武鄉縣蒞政惟勤宅心以恕嘗修南城甫底績遇北兵至全城無虞民懽然曰微劉使君吾儕盡罹鋒刃矣益敬愛如父母云

賈德潤雞澤舉人任沁源縣性嚴重遇事英敏嘗勸民輸粟實倉廩備不虞敵兵闖入抵縣境先期斂人畜城中指授方略督士民固守城獲保全

張廷槐字子徵萬全都司人初以進士任兵科給事中遇事敢言不避權貴左遷婺源縣丞擢知沁源縣爲政持大體念地僻民貧賦役煩重請弛不急之務罷其徵調公餘興學課

士甄拔賢才修學宮闢射圃行冠禮正風俗與文翁比烈累  
官按察司副使

高光烈山東膠州人嘉靖中任平定州知州性廉潔政尙寬  
平見用嚴刑者輒深惡之然賦辦事集吏民畏服雖武健者  
謝弗如尋調絳州去之日士民攀臥悲號

蔡倬祥符人知平定州沈靜文雅甫下車鈎鉅書筭宿弊一  
清州民稱快

羅錦滿城舉人任壽陽縣甘淡泊持守甚嚴苞苴竿牘屏弗  
與通爲政不毛舉細務不急公費悉罷之居二載政行化洽  
公庭絕敲扑聲致仕去

申傑靈壽舉人任壽陽縣樸直自持嘗以小弱不安悉豪強  
者爲之厲有犯者輒痛治之雖勢家請託弗聽尋卒于官祀

名宦

董希孟隆德人孟縣知縣清廉有守一介不取歷七載如一日待人尤委曲詳盡人亦不敢干以私

周夢綵直隸阜城人嘉靖間以舉人在忻州知州敵騎入犯念城郭傾圯將不文又懼以修築爲閭井擾乃卽市廛征其力頽城復完於各鄉屯田清丈後爲立石碣勒田畝四至及戶口租數俾無得侵越民咸便之祀名宦

時通錦衣衛進士中慶陽知府謫忻州規模宏大不事曲謹執法甚嚴不憚豪橫徵收賦徭止示以限期令民自輸無敢玩者革驛遞裁濫應元爲民便

范箕字斗南京衛進士知忻州有揮霍才訟者纍纍剖決立盡而律已甚嚴馭下尤肅百姓止之靡統劉穆之云升員外

耶歷官參議

張榮祥符舉人知定襄縣自奉儉約而勤于恤民修學校通水利置義倉病者施藥歿者給棺人咸宜之

李士元河南洛陽人以舉人知代州地衝要使客過者旁午小民多苦供億士元特設支房命謹愿吏掌之又上官遣吏來督賦輒索錢物不應則捶館人士元命如數以給未出境已具文詳報後雖強畀之不敢受矣尋被論去祀名宦

楊啟允狄道舉人知五臺縣世宗建三殿採木於邑募民伐山木得二十萬時亢旱水竭艱輓運啟允禱於天曰朝廷營建在邇徵木孔急民力疲矣願錫之雨是夕果大霑如注木盡浮出尋知朔州內捍郡邑外輸軍餉遂解右衛之困遷戶部郎中

藍雲錦衣衛人嘉靖間知保德州開水渠砌石城胥有碑記  
升太原府同知

齊恩陝西隆德人以鳴贊任河曲縣知縣外明內寬廉辨中  
濟以仁恕敵入犯恩揚兵河東多設旗幟金鼓之聲不絕敵  
大驚急卷甲去乃整船筏拯民之避兵者皆得濟事聞遣官  
賚之祀名宦

楊宜直隸衡水人嘉靖二年以進士知夏縣蒞任五旬櫛弊  
鋤奸威惠大孚以母憂去厯官南京工部侍郎

鍾恕南陽舉人知夏縣建廟學葺公廨修復獨樂園救荒有  
術重纂縣志升南京工部主事

徐祚宣城進士知夏縣節用愛民民歡然若更生升御史

黃棟湯陰舉人知夏縣性公謹能以廉自飭在官四年終始

一節尋擢平涼府知府以廉名爲天下第一

劉汀南宮人嘉靖二十年以進士知安邑縣政尙嚴明當路有爲年家報營逮其父子斃於獄更欲及其幼孫汀密防不遺獲免繪象歲時祀焉承委管鹽公直得眾心監臨將閱池鹽丁萬餘人爭門幾至敗輿麾之不從急呼汀至跨廐馬揚鞭一指萬丁奔避以此見忌死於非辜

李全內江縣人進士知夏縣政平訟理厯官山西參議

沈瑤浙江德清人進士知夏縣逮于學有文名朔望詣學宮爲諸生剖析義理講解不倦蒞政嚴而能明有養婦新歿臺使者以孝烈旌之力請改正尋議建藩府瑤曰鹽課爲國家大務若以翦桐勢必至侵牟恐爲大害事因得寢比入覲行李一肩祀名宦



岳粹冠縣人進士知夏縣節已愛民升戶部主事

王言大衛輝府人以舉人知夏縣建惠民樓修學舍改立溫公書院訟簡民安升保定府通判

季遐齡夏津舉人知夏縣才識諳練吏民畏服節省財力與民休息升太原府同知累官山西參議

岳相壽光縣人進士知武進調夏縣撫弱鋤強尋丁母憂扶視步歸土民以孝稱之歷官光祿寺少卿

李溥定州人進士知夏縣政平訟簡用省民安升戶部主事歷官陝西副使

傅永宿字熙宇靈壽人以進士知芮城縣渾厚高雅有守有爲均糧豁丁行取御史歷升都察院左都御史吏部尙書壽至八十有二子維麟進士官至工部尙書

江淳靜甯人醇厚耿介讀書以研理爲先宰芮城政績著聞  
邢化山東臨邑人嘉靖中以官生任絳州知州廉辦不爲刻  
覈遇訟獄悉令自拘有以和息請者卽聽之弗徵贖緩學正  
李必昌南海人也與其妻一時俱卒稚子弱女貧不能歸擇  
義民老媪護送歸里擢延安同知祀名宦

劉朝麒臨洮衛舉人知絳州絳有靈邱藩封招納無賴子弟  
甚爲民害朝麒正其罪諸宗人欲危之論以法卒解去

李朝綱武功舉人任聞喜縣性廉介自奉甚薄於衙蠶市魑  
馭之甚嚴凶荒發粟振飢祀名宦

閻倬隴州舉人任聞喜縣蔬食練服自奉如布衣嘗裁革侯  
馬貼役又擇諸生三人授以春秋後皆登甲乙榜祀名宦

高義葉縣舉人任稷山縣廉而能平遇事公謹吏民畏服歲

飢設法振貸祀名宦

李光遠平山人由縣丞升知絳縣公介廉慎改建學校新縣治及幕所鐘樓政績顯著升平涼府通判民遮道送者百里不絕

于葉長垣舉人任稷山縣性剛直遇訟獄剖決如流先任武陟調今官益勤其職興學校禁奸頑修築城池民爭鼓舞擢蔚州知州祀名宦

羅田河南光山人進士知聞喜縣寬宏不苟平心御物刑政皆有條理祀名宦

李復聘塾屋進士知聞喜縣持已嚴峻馭物和平長才大略修舉百廢城池公署廟祠坊表營繕一新然未嘗擾及民間歲遇大旱刺血爲文禱于神畢倚廟牆而哭是夕雷雨大作

四野霑足歲大熟後擢御史爲關中六君子之一縣人祀之  
畏壘六名宦祠中

馬三樂陽信進士知開喜縣挺特有定守嘗毀淫祠或說以  
禍福不爲動設法振飢加意興學邑初逋稅甚多至是悉勸  
輸如額上官爭異之祀名宦

史載德任邱人進士知開喜縣威重廉勤振饑荒懲讒橫除  
協夫設館餐修學舍明條教嘗以均糧遺悔邑人不怨桐鄉  
畏壘首祀之

張開行內黃進士知開喜縣杏利弊正風俗戒奢靡立品節  
勸農桑給牛種作養人才平息詞訟與物無忤雖婦人小子  
見之不異家人升監察御史有生祠

嚴天祥朝邑人進士知絳縣廉正執法民有毆傷人股以死

者累檢股無他天祥取二股察其形色迥異一訊具服遠近稱神以治行異等升御史

葛蘭信陽人嘉靖初知蒲縣斷獄明允鄰封不決者質成之倉庾盈溢遇歲荒振濟有方民獲全

牛惠咸甯人知蒲縣秉性剛方立政廉平興革協宜吏畏民懷去任民歌之曰來時行李蕭然去時行李蕭然泰嶽祠前經過寸心不負皇天

褚相海甯人由進士知霍州中除徐溝蒲縣等處助差銀審定輪編夫役歲省費數百創建霍山正學書院集庠彥肄業其中朔望親詣講學寒暑無輟士民立祠祀之

种奎四川階州人靈石知縣精明仁慈濬築城池疏通水利所措施皆有實惠祀名宦

王植安定舉人任靈石縣明敏慈惠修學造士尤竭其力祀

名宦

以上嘉靖時

王下賢陝西鳳陽人隆慶間以舉人任岢嵐州知州廉明有禦變才初下車敵大舉入寇下賈陰設守禦具倉卒悉備比大兵過糧餉芻秣能以時供給無缺又約束將卒不得入民舍恣暴虐民咸賴之祀名宦

李懋直隸人任岢嵐知州豁達老成時邊警告急有欲生事要功者議於岢嵐西北扼要路築長城其策甚迂四野驚惑懋力抗不從民用以安

初旦博興舉人令太谷遇事立斷百廢俱舉吏畏其威民懷其德

楊時甯河南祥符人隆慶間以進士知曲沃縣處事周詳慎

密馭吏胥嚴而有體期年政成威惠並著嘗均丁徭差役遠近貧富稱便百姓勒其事于石肖像祀之尋擢吏部主事累官兵部尙書

張敬一韓城舉人知鄉甯縣精明歷練減賦清田民懷吏畏爲一時循吏冠祀名宦

朱訓河南新蔡人隆慶元年以進士任蒲州知州廉幹有爲築州城創鼓樓修河中書院所興舉悉關百年大計累官通政司參議

李廷棟涑水舉人萬泉知縣興學校正風俗均稅糧革驛馬民被實惠而修葺古城復薛通之舊厥功尤偉

王欽安定人清修苦節事繼母以孝聞宰萬泉鋤強抑惡有聲三晉邑人紀其嘉績畫十二圖將內召以疾歸

李廷陳涑水舉人隆慶間任萬泉剛毅有爲誠心愛下興學  
校正風俗均稅糧革驛馬惠民之政多端有去思碑

史邦直字正菴山東樂陵人進士知臨晉縣有吏才數微行  
境內田廬里居皆能識其處邑軍民雜處軍故驕恣不用命  
捕者臨所屯輒稱官司凌親藩邦直以其玩法橫絕請徙他  
方草狀旦暮躬持檄上屯生員胡某者聞之懼丐學校諸生  
請命邦直曰惟吾法是聽吾貴汝胡生唯唯於是屯軍人人  
爭就約束乃按籍定戶積戶成屯屯立一頭諸屯有事事立  
一大管月朔大管事赴縣畫卯具有無違犯報官無不稟稟  
奉命惟謹三載考滿量移西安府丞累遷河東按察司僉事  
督理鳳陽屯牧致仕卒於家

王憑臨邑人隆慶間以舉人知潞安府有雅量始終未見其



怒然三尺法無敢撓者朔望謁廟畢與諸生論說理奧多所發明以憂去士民攀送車不得行官至大參

劉四科字健菴陝西涇陽人隆慶間以進士知長治縣沈毅淵博居官廉簡有守嘗值編審攜書吏數人入參府設警柝于外有巡視少年受錢五十文廉得之卽枷責不貸事訖人稱公明後擢吏部主事累官兵部尙書

徐鳴鶴杞縣人隆慶間以進士知屯留縣時尙苛猛鳴鶴獨任寬平有視民如子之心不競聲華人自以爲莫及升御史奈邦奇陝西鳳翔人隆慶間以舉人知壺關縣緩征疏網與民休息謙恭下士接紳衿以禮時時引見訪民間疾苦興除之期年後閭里改觀後擢指揮累官府同知民爲樹去思碑李春芳直隸井陘人隆慶間以太原府同知署石州事時州

經新破春芳加意撫綏恤死慰生不遺餘力復以其暇繕城池飾廟學殘疆復完祀名宦

孟一脈字淑孔東阿人平遙知縣以廉能擢御史仕至南贛巡撫卒

岳維華曲周人進士知平遙縣剛介不阿廉明自勵建敵樓敵臺以備守禦升同知

李棟涉縣人隆慶間以進士知陽城縣愷悌慈祥明敏果斷居三載以循良卓異賜宴禮部擢山東道御史民立二祠祀之

周詩更姓單固始舉人知沁水縣清慎和易約已惠民升戶部主事歷官雲南永昌知府

劉復禮山海衛人隆慶間以舉人知渾源州介直廉明御下

嚴肅刑清政簡振恤貧寒有禱雨立應苦井變甘之異州人立石頌德洎八年升工部員外老幼攀臥不忍舍

傳延耆厯城人以貢知應州性極端方政惟節愛辦山糧不辭利害值寇訐大有擔當祀名宦

韓應元厯城人進士知懷仁縣釐正祀典均平夫役至今猶遵其法升評事

許應達嘉興人隆慶間以進士知遼州清廉持已慈愛臨民樊自新陝西人知和順縣廉介律已平易近民祀名宦

蹇達四川巴縣人隆慶末以進士知平定州學問博雅爲時宗匠居官以廉自厲遇事斧劈理解動中機宜訟庭清暇官吏悉袖手而綱舉目張迄無廢事累官薊遼總督兵部尙書江樹蘭州人以舉人令壽陽仁愛廉明鄰邑有冤者悉往訴

稱爲江青天升正定府通判有去思碑

張學道盤屋進士隆慶間知靜樂縣忠懇勤篤期于以德化民左右不得干一語加意學政士風一變調安陽升主事

葉露新雲南人隆慶間以舉人任代州知州冰蘖自矢執法甚嚴有犯者必痛懲之時人比之包拯祀名宦

劉希孟安邱進士隆慶間任安邑清介自持一塵不染徵賦有羨卽抵正額遐邇皆知其正直有不侵下不奉上之謠升吏部主事

陳世寶鉅鹿舉人知夏縣知大體愷悌愛人築明倫堂建尊經閣縣西境有牛家窰爲荏苒數世寶剏築城堡招集流移盜賊屏息百姓名爲陳家莊後升監察御史

宋應昌浙江仁和人隆慶元年以進士知絳州州城濱汾常

患水噴應昌至築石隄護之民間地糧多飛詭親爲清丈弊  
永絕公館供具舊派之里甲悉改由官辦閭閻無擾歷官右  
都御史祀名宦

張允濟固始人以郎中出知絳州丰度威嚴不事鈎索人自  
不欺甫一年以內艱歸人咸惜之

張汝乾陝西洛南人河津知縣築城池修隄堰興水利放里  
長正亦歷編審悉公嚴課士子崇正學治邑若家修輯縣志  
文作涪州人進士知聞喜縣清苦勤慎洞悉民情升主事

韓超然山東臨淄人隆慶三年蒲縣知縣清介有爲於城池  
水利修舉必力而潔已愛民且供外絲毫無所染祀名宦  
邵蕙陝西甯州人以舉人知大甯縣重築北寨建高覽樓增  
西關城門凡三於北寨內建書院於小寨中置倉舍又築南

門外石隄以障河水久而不泐尋升真定府通判

以上陞慶時

周詩山東德州人萬厯間以進士任太原府知府性剛直諳練庶務雪冤抑鋤豪猾寬嚴互劑時稱良守乞休去祀名宦孫化龍獲鹿進士知太原府孟有妄男子假巫爲奸利龍廉得其狀時適亢旱因使問雨期巫窮伏按左道法誅之在官數年能以廉靜率先屬邑祀名宦

董仕河南汝陽人以舉人任岢嵐知州寬仁不喜立威獨於亂法之民不少假嘗廉健訟者立斃於獄一邑稱快擢潞安同知祀名宦

姚德重維縣進士知榆次縣甘淡泊事上官恭謹有禮馭衙臺市雖以嚴撫恤窮黎則又曲有恩意祀名宦

吳三省洛陽人知徐溝縣疾惡如讐廉幹有爲凡事不屑近

功嘗整縣城爲萬年保障祀名宦

李光祖字克肖保安人以進士任榆次知縣仁慈能濟以嚴  
毅嘗遇歲饑振給有法窮乏不至流移人尤感頌不置後擢  
監察御史祀名宦

于天經冠縣進士任陽曲縣清勤愛民初涖任卽策款段馬  
日隨二隸巡行阡陌間勤課農桑倦則止僧舍炊脫粟飯遇  
訟者以片詞折之歲饑停徵調屢蒙譴責不爲動尋以艱去  
攀臥數千人祀名宦

徐守謙洛陽進士任陽曲縣通敏有吏才先任榆次有能聲  
及調涖果斷明肅剖決如流治行大著擢監察御史未任卒  
士民立石識之祀名宦

周永春金鄉進士任陽曲縣念省會習俗奢侈以節儉爲先

委曲開導又邑爲藩封地豪宗橫肆多誣陷平民悉裁以法  
洎任五年擢禮科給事中祀名宦

史記事字義伯陝西渭南人進士補榆次縣精明果斷先任  
介休力興水利功績最著洎榆次益銳意民事築城濬渠營  
修縣志於邑徭役三致意焉後升兵部主事改雲南道監察  
御史榆民及介休各建祠祀之並勒實政於石

劉似鼈字占宇直隸高陽人進士知榆次縣頓直負氣節先  
任聞喜有循聲在榆次捐俸設義學開東陽鎮水渠溉田數  
十頃秋滿擢刑部郎後以莊浪道佩四符辦理軍務卒於官  
朝廷嘉其忠勤予祭葬

李元同州進士任祁縣平恕廉明均徭役省解納飭學宮恤  
行戶開渠穿井清驛彌盜革一切賠累剝削之苦民德之兩



地立祠

屈鍾嶽字毓秀蒲城舉人令太原清慎敏捷循聲籍籍尋轉光祿署正遷部郎擢大同知府未幾卒鍾嶽有豁達之度不事纖趨居官正直不阿旅襯歸里行李肅然

賈毓祥平度人進士知太谷縣操守嚴潔興利除害當時有眞父母之稱祀名宦

張子清無極人令太谷興學育士減稅甦民晉中有何處春臺似太谷之謠八年升永甯州

李應同州人祁縣知縣明斷有守興學校均征徭興渠利民凡賠累苛派之弊毅然豁除被其德者咸深愛戴祠祀之王一龍蘭州舉人知徐溝縣剛毅不畏強禦撫恤士民恩意曲摯後以抗閹宦謫官士民稱屈祀名宦

于彥英直隸固安舉人知徐溝縣器識英敏發摘奸伏如神  
嘗丈量地畝立法均平民咸德之祀名宦

馬天俸密雲衛人任清源公明廉幹清丈地畝均平糧石地  
方永賴

周璧厯城舉人知交城縣實心愛民雅甘淡薄裁冗費墾荒  
田開河渠繕城堡尤加意學校於貧不能自存者時時振給  
之祀名宦

姜一鳴陝西蒲城人以舉人任文水縣清介自持治窩禁暴  
其清丈田土振恤凶荒民尤被實德云祀名宦

郭宗賢邯鄲舉人任文水縣嚴明識體要嘗修邑城迄今稱  
保障祀名宦

文養浩耀州舉人任文水嚴革私科勾攝概差木阜積穀備

荒四境肅靜調嵐縣歷雲南知府建祠柏茆山巔祀之

趙夢麟廣平進士由兵部主事謫任嵐縣清丈土地編審丁徭杜豪戶之兼併清奸胥之隱詭重建公廨百廢具舉升兵部員外

傅淑訓湖廣孝感人萬歷中以進士知平陽府少事父母有孝名居官廉正遇凶荒煮粥振饑公退閉閤纂志網羅放失成一郡信史尋遷本省督學道稱公明累官戶部尙書

劉餘祐字玉孺山東濱州人進士知平陽府沈毅孝慈持守狷潔時有知州餽送黃金觀音一尊嚴絕之升河南睢陳道參政遷本省右布政使趙曲鎮有遺愛生祠

張維世太康進士歷官平陽知府捕治絳州奸猾數十人就逆副使分巡其地累官宣府巡撫崇禎十五年二月流賊攻

太康與知縣魏令望拒守城陷抗節死

喬因羽陝西耀州人以進士知洪洞縣修學宮建奎樓立社倉清賦役至捐俸築公署買馬甦傳郵歲省民費幾千金尤爲實德擢兵部主事祀名宦

何出光扶溝進士曲沃知縣初下車卽革除里甲供應諸項歲飢發粟振貸兼設粥廠數十處疫作施醫藥有死者輒埋瘞之朔望詣學宮爲諸生講經立社課藝手自丹黃擢監察御史祀名宦

邢雲路直隸安肅人進士臨汾知縣時值大飢流亡載道銳意振恤有餓孀輒掩覆之嘗築千金堰興水利開永豐渠防水患輯縣志著冠婚喪祭議正禮俗又於四門建惠民局於驛建生圉文章政事爲一時冠在任五年後立祠汾河

馬從龍安邱進士知洪洞縣端方鎮靜定催科條例至今爲晉省式折獄有清獻孝肅之風

房壯麗字威甫直隸安州人進士知襄陵縣持身廉潔爲政和平敦大而綜理細事無不畢舉後官吏部尙書襄陵人爲樹去思碑焉

毛炯任縣舉人知汾西縣心恕法嚴痛絕私謁興學校教紡織栽桑柳體察民情纖悉備至祀名宦

方應明河南光州人由進士任壺關縣調繁洪洞興利除弊有神君之稱尤惓惓育材嘗拔士授經藝咸登科第時號八俊士民建祠立碑

趙彥復河南杞縣人進士曲沃知縣廉敏有治劇材嘗減均徭募驛馬革堡官門禁諸役煮粥振飢延邑人閭光重輯沃

志擢戶部主事祀名宦

馮逢皋陝西三原人進士襄陵知縣嘗修書院以育人材成晉橋以通道塗興水利以灌田畝政績卓然民爲立碑識之祀名宦

周士樸字丹其商邱人進士除曲沃知縣度量寬洪喜怒不形持大體不喜鈎距愛民出於至誠以德化之民亦洽其德化相戒不犯升給事中仕至工部尙書賊陷商邱死之陳勛字典伯莒州進士令襄陵持躬數政正直端亮至其玉成多士邑內簪纓皆其桃李

楊作楫字夢符蓬溪進士自聞喜調任襄陵節費甦民編審尤協輿情有神君慈母之稱官至山西督學道

侯于魯字子建渭南舉人知太平縣才幹素裕諳達民情建

清儲鎮開墾荒田升保德州知州

沈時敘祥符進士令曲沃發奸除暴政教嚴明刑清訟簡民服吏畏清丈地畝均平糧石民力大甦行取御史

李時茂乾州舉人知鄉甯縣節愛恤民嚴明馭吏嘗捐俸修常平倉及養濟院整理儒學號舍清逋賦完額稅鄰民訟上官咸願得鄉甯李青天廉時論稱之

白宗舜清澗舉人萬厯間知蒲州蒲素多豪右宗舜一介不取禁絕干謁嚴革諸弊猾吏畏服

勇慎蒲州舉人任蒲州居官五載不輕言笑案無留牘刑政有關大犯者權勢不能奪

王毓陽陝西綏德州人進士臨晉知縣凡前令史邦直規制悉遵守之弗失間有未台者稍稍變通故治不勞而聲稱遠

毓陽先任靜樂以廉能調臨晉云

何允升河南杞縣人進士猗氏知縣時當承平上恬下熙奸弊叢生允升殫力釐剔撫善良鋤奸俠崇學校繩豪貴恩義兼至時稱其體備四時擢知蒲州仍卯翼邑人不替後入爲兵部員外卒於官囊止數金不能具棺斂事聞給葬以歸趙岸盤屋進士臨晉知縣廉明善斷雖大獄案件不移時輒具百姓歡呼稱無冤鄰邑質成者踵相接值歲旱禱雨四野霑足尋以勞卒祀名宦

陳經濟字衡晉禹州人進士除猗氏令性澹泊沈毅力爲地方謀生養丙戌歲大饑借錫上官並捐俸設粥廠活人無算所攜銀帶一束折以餬口堂下槐角甚繁得豆數石與縣尉分啖之達官輜軒迂徑不入邑會邊儲告訕部使者嚴督繫



經承吏經濟曰官實不才吏乎何尤乃奪索自繫使者駭去  
解州七郎堰護城隄也延二十里州守請於上官起十縣夫  
築之經濟曰城隄非鹽隄可比奈何徵役各縣乎弗應州守  
關提不已詣解見守爭之乃罷至今猗無七郎堰工皆經濟  
力也

吳崇禮山東甯陽人進士知蒲縣調劇臨晉邑北地廣人稀  
拋荒者眾崇禮置官莊具牛種召集流亡今其莊名曰吳家  
莊任滿擢監察御史

高維岡陝西神木人進士任臨晉修舉廢墜自縣治學宮城  
垣一切聿新又於峨嵋頂築文星臺下建文昌閣以聚風氣  
祀名宦

李景登廣甯進士任猗氏才敏氣恬不以崖岸自異爲政務

持大體請除荒地課業諸生升吏部主事

郭九有涇陽進士任猗氏操嚴冰霜發奸懲暴稟不可犯丁憂歸服闋再補猗氏邑人鼓舞歡迎駢填道路始終不易其操升禮部主事

麻永吉字慶川慶陽人自庶吉士改御史萬厯間任潞安知府性長厚其治主於不擾嘗易二紬旣而悔曰價雖售恐開取用例仍還之六年市肆不知供應升本省副使

劉復初字天虞陝西高陵人進士知潞安府時府學規制未備建尊經閣于北義陽文昌魁星三樓于東興賢育才多所成就性剛方廉介守上黨機杼之地未嘗履一絲曳一組尋以貢篚拂中官意降廣東提舉後厯官太常寺卿

洪良範沂州進士知潞安府精明英察雷厲風行豪蠹一時

敘迹佐領差役皆由堂撥嚴禁坊里不許支官以寬物力升副使

陳儒字鑑韋新建人進士知潞安府改建長治學創書院延紳士會講多所發明又置學田修西城水牕以備蓄洩革收頭以蘇里甲人皆稱之升河南副使

李杜永年人進士知潞安府寬厚明決張弛俱宜振饑懲奸地方安堵升陝西副使

張鶴騰字元漢隸川衛人進士知潞城縣尋調榆次續密有守兩宰劇地清操維一擢刑部主事幾不能具道里費士民立祠祀之

張主敬柏鄉進士知長治縣性廉潔一清如水創建考場歲省民間數百金修縣志義例謹嚴升主事

崔爾進西安右衛人進士知長子縣俗刁悍有自稱劉千斤  
不畏府君者爾進執之令曉夜巡城已復慰諭遂成良民編  
審時富民類衣敝垢翼避徭役爾進廉所易衣悉置其側乃  
具服擢御史

經學參全州舉人知黎城縣寬嚴並用豪滑斂手良善鼓腹  
至公審編絕弊實尤足爲法

方應明光州進士知壺關縣廉明公正斷獄如神多所興革  
民立祠祀之所著有治壺論日中碑諸刻調洪洞縣

李仙品高陵進士知長治縣導揚風化不事鞭扑務爲教養  
之實升揚州府同知官至偏沅巡撫

劉一任萬厯間知汾州府爲清官第一向有石雁照汾州清  
官不到頭之謠一任鑄鐵鳳鎮之擢憲副去

夏惟勤直隸冀州人以監生知永甯州修學築城督課士子  
砥礪鄉約時回鶻爲患率鄉兵大破之升青州府同知去任  
之日老幼涕泣建生祠於東關

尹覺民進士知汾陽縣居官廉幹著有能聲政以利民善俗  
爲大端而舉墜補偏尤令粉者不可及

魏學徵咸陽舉人知平遙縣精廉果斷民爲建祠立碑

楊天璋永昌衛人由選貢知平遙縣操凜冰霜政崇簡要裁  
衙蠹革收頭居官二載而卒遠近咸哀傷焉

楊廷謨清苑舉人知平遙縣蒞事風生撫民如子清田畝稅  
課修文廟舉祀典不媿循良升光祿寺署正

楊正達武陵舉人任甯鄉縣清操絕俗推誠待人歲旱禱雨  
輒應民祠祀之

公一楊蒙陰舉人知甯鄉縣端嚴有體無苛政汰丁減徭民甚戴之官至郎中

郭然咸陽舉人知甯鄉縣明作果斷人號神君不苟不擾上信下畏

諸葛昇浙江壽昌縣人由選貢任臨縣風格清奇文詞俊逸多有惠政其葺西城興水利具載碑記去後士民建祠又祀名宦

張問仁邢臺舉人知臨縣平易近民端方持已諸所建置各有其功憂去人多思慕之

許維新堂邑人萬厯間知澤州仁慈愷悌簡約淡素先教化而後刑罰緩催科而善聽斷獎借士類惠愛百姓去之日士民老幼遮留三日始得出境所在尸祝有生祠去思碑

王所用字賓吾河內進士任澤州知州澤俗故剛悍所用馭以寬大豪強者初易視之久悉馴服嘗引訟者至膝前俾盡言徐爲開陳利害各和解以去張自安等二十人已定擬矣廉知其寃力爲湔雪崇學校興教化修張公書院集一州四縣士肄業其中時察其勤惰後升任去士民建生祠祀之賀盛瑞獲嘉人官工部爲內監中傷備兵鄜延遷澤州樸誠清正不畏強禦作興學校請減稅糧修城垣裁冗費清驛站均收納禁淫祀獎節義盡心民社不辭勞怨以疾歸囊篋蕭然士民思之有生祠德政碑

劉一相長山進士知高平縣政適寬嚴學綜經史文章吏治推重一時升給事中

劉應奇中牟進士知陽城縣清慎謙和一毫不苟取歷六載

襄蔡肅然升吏部主事去日民攀留者數萬人立祠祀之  
王雅量費縣進士知陽城縣有惠政士民德之升廣東道御  
史按關中道出邑內邑人士無貴賤老幼深山窮谷爭迎道  
左如見慈母官至光祿寺卿祀名宦

鹿久徵定興進士襄垣知縣擢御史時以軍政事貶黜言官  
三十四人久徵抗疏申救亦謫澤州判官後遷知縣卒  
任大僚高陵進士知襄垣調高平才能敏捷禁豪猾雪冤獄  
人咸悅服祀名宦

張應詔咸陽舉人知陽城縣鑒澄有長才創軹城修學宮清  
地畝百度具舉升御史

王象蒙新城進士知陽城縣性精明行以渾厚崇學校課農  
桑遇旱禱雨卽應善政不可枚舉升御史



王良臣新鄭舉人知陽城縣沈毅有遠略清操介守愛民如  
子修學校勸農桑百廢具興升河間府同知有去思碑

熊偉商城人進士知陽城縣誅鋤強暴優禮耆髦令行禁止  
吏畏民懷

李士登洛陽進士知陵川縣冲齡筮仕諳吏治威惠並施尤  
作興學校厯官布政使

雍獻策睢州舉人知陵川縣存心仁愛行政公平士民思之  
張汝濟通州舉人知陵川縣德政清操爲一時推重

曲遷喬長山進士知沁水縣肫誠惇大獎拔才雋升工科給  
事厯官順天府尹

王基字對滄青州衛進士萬厯初大同知府重節義戢橫暴  
熟諳邊務升分守河東道與利剔弊保釐多方十一年復任

河東道人皆鼓舞歡呼迎者塞路下車問民疾苦如家人父子惠政周洽十六年巡撫大同謹斥埃明賞罰練將士裁冗費通商賈嚴懲強禦奏銅豪宗四民甯帖邊方晏安累官戶部尙書

趙之韓汜水舉人知渾源州立政存心皆爲地方起見州人沐其德化立祠尸祝

連格禹州人知大同縣惻惻無華綽有古風遇事剖決如流悉得其情士民德之升御史

申其學山東人以貢知朔州深悉民隱當時稱循良第一升長沙府

屈煒陝西蒲城人由選貢知朔州不虐善良不畏強禦在任八年加銜府同知仍管州事致仕

岳惟華曲周人萬厯間以進士知遼州申免漂沒地糧士民感頌不衰

張正儒新安舉人知和順縣廉明果斷豪猾屏跡祀名宦

萬象新宜興人舉人知和順縣合里併甲薄賦輕徭祀名宦  
張儒枝江人以貢知和順縣愷悌慈愛視民如子祀名宦

朱進忠桐柏人以貢知榆社縣撫字有方民立石建祠

李繼元甯夏人以貢知和順縣修城垣振災荒暇則閉閣纂縣志士民依之祀名宦

雍學詩閩中人以貢知榆社縣自奉淡泊勤於治振濟有方所活以萬計致政歸當道給勘合資路費民甚思之

吳永圖韓城舉人知榆社縣緝盜賊申鄉約課士勸農恤孤拯弱嘗辨吳子誠寃反曹封野獄發徐貞女誣一時稱爲青

天審編里役獨宿公所集里老戶甲詳定上下民以爲允遷  
晉府審理輿論惜之

俞汝爲字毅夫江南華亭人萬厯間以進士官山東僉事左  
遷沁州知州敏厯郡縣威望素著涖州招流移重學校術者  
言漳水徑南下於州不利遂築石渠使東流汾州政府後割  
沁及屬邑隸之民疲於奔命爲上疏闕下復舊制沁陽驛舊  
設募夫爲民累建議革之嘗修州志稱精核在沁五年擢工  
部去沁人立祠祀之

史應元知沁州清勤仁恕剔蠹惠民善政甚多祀名宦  
干木靜海人以舉人知沁源縣清儉安靜未幾乞休歸

黃元會甯夏中衛人以貢知武鄉縣催科不擾編審無私開  
荒田招流移勤樹藝教紡織修學育才築隄捍患在任九載

士民德之建生祠勒其事於石

靳賢字子哲陝西靜甯州人以舉人任沁源縣釐奸剔弊吏畏民懷嘗遵例履畝定稅減三分之一縣城舊係土築每歲傾圯申請當道費以磚石爲生民豎百年保障升路安府通判尚嵐州知州乞休去沁人立生祠祀焉

侯體乾歸德人以貢知沁源縣文學操守胥爲當時推重居官勸化風俗表揚節義裁省里長勸課農桑嘗捐柴馬銀窮民逋稅人尤稱之尋以母老乞休當道檄留不願去百姓遮道扳泣如失慈母

喬應萃陝西清水人萬曆十一年知樂平縣廉能清淨有古循良風升重慶府通判

藍尙質膚施人以監生知壽陽政尙勤儉務以躬行化民邑

素不諳紡織尙質始教之迄今民賴其利祠祀之

錢一鶚掖縣舉人知樂平縣搏擊豪強噢休孤弱持躬清苦  
升錦衣衛經歷累官知府

張國璽任邱進士任孟縣知縣平賦均徭釐奸剔弊尤善折  
獄大吏奇其材有疑案悉以委之一時有東察院之謠

田應揚雞澤舉人萬厯間由廣昌令擢知忻州賦性冲恬心  
切愷悌服食依然寒素喜下問田婦攜兒不憚諮詢升萊州  
府同知

張堯行宜川人以貢生任忻州知州端毅有執持不爲利害  
惑嘗以城垣爲州根本以甌贅之嚴督精覈日夕不少倦及  
告成幾嘔血

楊維嶽餘姚進士知漳州府謫忻州政尙廉平徵解不染指

山西通志卷一百一十五 名臣列傳  
聽訟立發訊單舞文者斂迹歲荒煮粥惠民撫流移八百餘  
家開水渠三十五道墾荒地五十餘頃清驛傳捐俸修學繕  
堡民甚德之

陶光寵固安人由兗州判擢知忻州寬和勤慎加意恤民留心造士清丈地畝有均平之頌遷晉府長史士民赴會城終其任省問不絕

王濯征西安護衛舉人知定襄縣剛直嚴明發奸摘伏吏胥斂迹節里甲廣儲蓄置社倉力寢添設驛遞之議民獲安靜升保定府通判

白璧清澗舉人知定襄縣潔己愛民練才應務省里甲撫流移憫旱災便民壯簡詞訟免勾稽集士課文助喪完娶與夫修坊鑿井諸多善政升絳州知州士民立石頌德

王立愛崇義人以貢任定襄知縣廉敏愛民嘗給以紡車令習女工又令種樹道旁爲材木用飾廟學崇節孝興起教化一變澆漓之俗後擢鎮江府通判士民肖像祀之

王統陽綏德進士知靜樂縣政務廉平嘗以驛傳滋擾請移縣內親爲參驗給付民尤便之改臨晉攝工科給事中

劉沂字蓮洲完縣人以貢任靜樂知縣性伉直善折獄嘗改立莊頭令戶自爲輸納豪猾者不得中飽又改建文廟士竊乏不能自振者時展給之尋擢平涼府通判

黃思道仁和人萬厯間以舉人任代州知州素廉能蒞任時適大閱部院使者一時俱集費費不支思道調度有方不待嚴督省早辦尋卒於官幾無以斂民立祠祀之

陳謙蠡縣人以舉人知五臺縣政事練達催科有方振修學



山西通志卷一百一  
李官錄  
校獎拔士類升太原府通判

劉輯濟剡城人以貢知崞縣廉明仁恕旌善除暴豪猾斂跡  
地方安靜

光祖信陽人知五臺縣耿介清廉勤於其職嘗增修廟學勒  
貪廉二箴於石以自警

胡柟字棟隆陝西洵陽人以選貢任夏縣知縣遷保德州知  
州殫心民事百廢具舉在州修城垣立社倉闢養濟院惠民  
局修文廟製祭器繪祭儀圖補經籍數十部立社學延師訓  
童蒙輯州志坊表舖舍監獄悉修舉後升鄖陽同知將去老  
幼焚香送者百里不絕建生祠四十餘處

韓朝貢廣施舉人萬厯中知保德州貌甚樸有揮霍材嘗請  
銷絕軍餉河糧力與上官抗卒如其議又以州爲邊邑城垣

尤重倡教贊其四面朝貢先官嵐縣嵐縣人諷思之至是州人亦建祠祀焉

王甲字劍塘利津舉人知保德州先任大同通判有廉能聲及蒞州益厲清操剖決是非片言悉得點者至不敢吐一辭後擢夔州府同知祀名宦

黨傑陝西城固人以進士知河曲縣溫厚縝栗取豪猾甚嚴而噢休小弱則倍極仁恕持身廉潔正供外絲毫無所取三年如一日尋以艱歸後補文安縣行取監察御史

高應科邢臺舉人知河曲縣操履清潔衣食如貧生屢經薦剡在任三載以憂歸百姓遮道泣送如失慈母

楊益臨潼人萬厯三年以舉人知夏縣廉勤信果政事井井有條以狷介不容于時尋去職

孫養默鄒平舉人知夏縣問學淵深工詩文爲政慈祥愷悌升衛輝府同知

柳佐臨清進士任夏縣才識高明政體諳練邑號多訟剖決如流三月後訟簡刑清民賴以安調曲沃

袁應春鳳翔人以靈石知縣調夏縣時太監張忠奉命開鑛威福大作令長皆長跪白事應春獨抗禮曰公雖貴內侍也令雖卑臣子也無庭參理忠大怒劾之降永甯衛經歷天啟改元以薦起刑部主事至員外

韓薰爲夏縣知縣稅使張忠奏調薰簡僻吏部尙書李戴以內官不當擅舉刺疏爭之戶科給事中程紹力爭鐫秩斥薰爲民

魏學徵由舉人知平陸縣體恤民瘼舉弱抑強引渠水以資

灌漑建文臺以振士風人懷其惠去後爲立德政碑

杜濬任邱舉人萬厯中任絳州知州廉明能斷然樂與民相安絳俗故輕生雖小忿輒自斃以累人濬嚴禁之有犯者悉令自瘞俗爲一變佐貳咸閉戶無所事事尋致仕歸祀名宦申田靈壽進士知聞喜縣布衣疏食儉約自甘胥吏有進美餘者指戒石語以矢之民有匹馬清風之謠

馬懋安邱人以恩貢任稷山縣知縣清勤剛斷勇于任事遇歲荒請振倍他邑捕巨盜王邦清立斃之嘗申減代納文水嵐縣徭銀七百兩卒於官祀名宦

苗應元武定舉人知稷山縣時當大荒後民間疾苦悉爲祛除賦役火耗禁之尤切吏胥悉凜凜不敢上下其手甫年餘遽卒於官百姓如失怙恃祀棠陰祠

劉一相長山進士知稷山縣愷悌慈祥尤加意學校拔諸生  
雋異者親爲講授諸生奮起以不得與爲恥擢南京兵部主  
事祀棠陰祠

李希召蘭陽進士知稷山縣廉明善斷事無留滯衙蠹市黠  
相率吐真情絳藩聞之亦戒左右無犯遇士大夫特厚貧乏  
者資給之或有冤抑必亟與昭雪調合水縣祀棠陰祠

白鯤南和舉人知河津縣修遮馬峪清泉灌千澗等里民田  
至今賴之升平陽同知

崔儒秀字敬初陝州進士知絳縣性敏捷有膽識發奸謫伏  
如神勤于課士親爲指授縣人代鄉甯安邑輸納苦累滋甚  
力請得豁免尋調翼城累官開原監軍道遼陷殉節死祀名  
宦

吳峻陝西鳳翔人以舉人任稷山知縣雅甘淡泊日用薪米悉自給不委支役上下省會以一二隸自隨見者不知爲令尹也嘗立大社集諸生論文開薛村渠使資灌溉甫八月以憂去祀棠陰祠

喬允升孟津進士知聞喜縣長才雅量有政聲因錢糧合戶催徵奸民每多拖累乃設門簿至今使之

張耀字融我三原舉人知聞喜縣以慈惠撫民民爲立祠歷官貴州布政使寇孫可望等至不屈死

周鳴泰商州舉人知聞喜縣清而不苛勸民完逋稅諭民息爭訟立月課取名士甲乙之農有乏耕具者婦女有乏紡車者官給之以疾卒士民慟惜之

時化澠縣舉人知聞喜縣廉介敏練剛正無私興利除弊事

事求爲可久申革力銀貽惠無窮執法不撓爲權勢不喜遂解綬歸百姓攀號不忍舍歷久猶思念之

薛承教咸陽進士知稷山縣剛明開爽率正不阿遇事擔當興除無遺力申減站銀創建汾橋永爲民便升南京戶部主事有去思碑

王豫立涇陽進士知稷山縣慈愛精明時礦使四出大璫將臨稷邑妄云鳳凰山銀可採以文走使止之去之日囊無一錢士民攀送號泣有生祠

儲至俊字賓賢靖州人萬厯四十三年以貢知臨州植桑麻勸織紡修大觀樓開東門重葺學宮鑿泮池勅尊經閣招來流移輕徭薄賦貧民逋亡者咸復業焉

吳崇禮甯陽進士知蒲縣潔已愛民歲荒多方賑貸尋以才

調臨晉後官兵部尙書

余建隆開化人知永和縣操履貞嚴踰年致仕束裝無具隰州守親臨祖餞忽報有地坎陷得宋古錢一窖守曰此天爲廉吏賜也命市之以爲資斧隨一僕負繖而歸見者莫不嗟嘆

劉紹宗武城人知大甯縣政教兼舉考滿民赴部保留復任三年

張遂華州舉人萬厯間任霍州德政廉明發奸摘伏厯久稱頌不忘

楊楠盤屋舉人知霍州性莊嚴爲政簡而有體立文社督諸生講藝指示奧窔尤倡明正學力請故學正曹端從祀孔董欣修山東長清舉人知趙城縣舉行鄉約修建學宮開



家渠於城北引汾水灌田數百畝民至今賴之操行清潔

之日行李蕭然

以上萬曆時

田景新貴州人泰昌時以進士知高平縣寬平簡易清驛

減租賦爲德於民甚厚未幾調陽曲民立祠祀之

張任學安岳人天啟五年進士授太原知縣以才調榆次崇禎中舉治卓異入爲御史後請易武階改河南總兵官禡職卒

李嵩棗強人以進士任翼城縣知縣慈敏多惠政邑舊有代辦差銀雖經前令革免猶存六百餘金至是力請悉除之擢御史出按本省待翼民尤厚遇兵荒旣捐金賑貸更爲疏蠲正供累官湖廣布政使祀名宦

張泰階上海人天啟間以進士知潞安府敷政寬和然能自

守不爲不義屈有中官乘傳過上黨氣焰甚熾監司以下俱  
郊迎泰階惟遣人投刺而已中官雖甚怒卒不能加害

苟好善陝西醴泉人進士知長治縣英毅明敏政聲最著尋  
以憂去後官至濟南知府死于難

李先成長垣舉人知平遙縣重士撫民抑強維弱有風力聲  
卒於官人皆惜之

張自蘊卽墨人天啟間以舉人知陵川縣德性仁慈器度恢  
宏鋤抑強豪興起斯文調介休

董之表陽信舉人知沁水縣清謹仁恕去任父老子弟遮留  
號泣二百里絡繹不絕升晉州知州鞏昌府同知

王象雲新城人天啟五年進士知大同縣擢御史言吏部尙  
書王永光用一仙克謹而山西壞不納已劾大學士溫體仁

官終山西參議

劉以守雲南籍浙江分水人以舉人任山陰知縣山陰爲邊陲地保障尤亟以守有應變略又明於形勢蒞任後改河道築圍墻濬池濠製懸樓屹然巨鎮焉

江若練文登人天啟間以貢任長治丞擢知崞縣廉明公勤力請罷葦租又請空地租輸學給寒生婚喪不足者實心愛民備載善政實錄

李蘊秀永年人天啟二年以舉人任平陸縣知縣性剛果鋤豪強不少假而培養士類則情義倍至祀名宦

姜士佐膠州舉人知芮城縣性仁慈撫民造士具有才幹修城堡救凶荒勸開墾曲盡其術祀名宦

王楫泰安進士自柘城調安邑一清如水政尙仁慈邑人戴

之升戶部主事

以上天啟時

湯啟祥宜與人崇禎間以進士任太原府知府有清操不妄取愛民如子於奸猾爲害者窮治不少貸頌聲大起祀名宦孫康周字晉侯安邱舉人知太原府流賊入率死士巷戰被執說降不從乃見殺

任孔當濟甯進士任陽曲俯詢利弊立爲興革時久旱步禱百里未至城大雨如注以艱去攀轅臥留者擁蔽不能行彭而述河南鄧州人進士知陽曲縣捐金修城募民兵三百人號太原忠義營甲冑旗幟具備又買馬廐四百頭捐乘馬四匹給驛傳新城南狄梁公祠並矜其後裔使奉祭祀歲饑煮粥哺飢民祀名宦

范志泰虞城人以長史署陽曲縣事流賊陷城不食死

岳維楨東明人以保舉任清源知縣值歲大饑盜賊蠭起維楨留心撫字俾民不流離又偵盜賊所在搗其巢穴殄滅之遇災患捍禦必力鄰邑胥獲安堵記名宦

薛國柱吳堡人進士知交城縣純樸精明能聽訟勤課士以時值流寇亂登邑城四面鼓舞有方不期月事集後升河南汝甯道監軍督餉記名宦

張首標玉田人進士知交城縣剛腸疾惡善折獄喜與儒生遊捐俸課藝親定甲乙調汾陽記名宦

王凝命任交城知縣廉幹有爲時寇盜孔棘悉力剿撫邑人胡曰蕃以犒軍沒於賊斂而殯之爲文以祭卹其家特厚記名宦

武清周華州舉人知文水縣性剛正胥吏懾服值內璫過邑

清周持以大體不少屈調繁汾陽縣

程世昌光山進士崇禎間知平陽府率屬以正馭吏以嚴升直太道

周文斗沂州人進士知臨汾縣時東西山賊徧起而郡城故無兵可守文斗命衛指揮王章督率武生及壯快衛軍時時征勦躬自調度兵食爲百姓捍禦賊不敢犯士民立祠祀之王允長字慶我吳橋進士知翼城縣尋遷澤州知州廉介剛正爲政以息訟勸農爲先在翼城建文峯東南科名日起儲備守禦具寇至不能爲害在澤州嘗作愛錢歌詞雖俚而痛切可警世之役役於利者後升河南憲副死闖逆之難魏公韓黃岡進士知太平縣縣爲伯益故里祠與墓爲人侵占幾浸滅不可識公韓釐正之重加修理邑遭寇患城垣圯

壤請于上官復募諸紳士悉力築之已而寇復至督鄉兵捍禦斬獲無算民立生祠祀焉

李士淳廣東程鄉人進士知翼城縣績學工文有吏才蒞政能勤崇禮士子嘗建翔山書院講藝課業雖寇臨城下不爲輟調曲沃縣擢翰林編修祀名宦

楊家龍曲陽人由選貢知鄉甯縣拯災傷撫困清操亮節三載如一當流寇蹂躪時邑猶賴以稍甦焉

李用質濟甯進士知襄陵縣性慈祥居官無赫赫名而當機立斷胥中肯綮值歲飢設廠煮粥擢兵科給事中祀名宦  
李乘雲高陽舉人知浮山縣流賊數萬來寇手發一矢獲其魁眾遂遁累遷山西僉事以才調大梁道賊破禹州亂刃交下而死贈光祿卿

尹任臨清州人嘗任臨汾知縣歸殉節於鄉

段文光祥符人進士知曲沃縣才器卓犖重君父大義熟習戎事時流氛蠶動練鄉勇較騎射教以坐作進退之法威聲遠播賊莫敢犯祀名宦

耿章光山東館陶人山西巡撫如杞子如杞忤魏璫下詔獄章光充家僮侍獄中崇禎間以進士知曲沃縣性剛方以蒙城驛代翼走馬爲邑累抗顏大吏前援祖制與爭退復具詳以請尋調簡香河瀕行遺一聯寅賓館中曰解印空傳去害馬移山何日是堅城自書其旁云是沃兩大事敢以望後之君子祀名宦

王樞徵安陽舉人歷官蒲州知州忤豪宗謝事歸甲申二月爲賊執不食死



許侗高陽舉人任萬泉縣知縣自守廉潔愛民以誠於奸弊所在澄清務盡尋調夏縣祀名宦

李昌齡咸甯人由舉人除猗氏令關西馮從吾門下士也潛心理道砥行直方下車卽誓於神曰負所學者天厭之革火耗絕私餽鋤弊洞姦胥徒凜凜講學勸農於學宮裡祀尤爲加瑟製樂器習舞容勒圖於石俾永爲遵守尋以不嫻於俗解仕去邑人至今慕之

閔自寅烏城舉人知臨晉縣能不畏權要愛功名以行其志屬河內大饑朝廷多事中原流寇充斥窮民幾欲揭竿自寅蒿目時艱多方補苴故民雖流離死亡而卒無怨叛者升常州府同知

李樹聲岐山人知猗氏縣廉靜不擾有德及人丁內艱不復

仕逆閩僭號樹聲曰吾家六世受國恩今安往乎卽夕呼天而逝

張斗溫縣人以選貢任萬泉縣知縣嚴肅有才能流寇侵境督吏民禦之寇不敢犯尋調趙城後擢大同府同知

焦浴字警盤甯夏人以貢任潞安府同知剛果有膽力能常大事協道臣王肇生平回賊同帥臣曹文詔勦流賊王加允俱身先士卒所向有功題授本府知府時藩王側有怙勢作威福者浴廉得之立置于法又以盜賊蜂起奸宄易生建街巷柵欄修城頭堞口尋加副使銜仍管府事後調汾州府遷本省糧儲副使

艾徵泰米脂舉人知屯留縣申鑄荒糧民賴以蘇升偏關同知

饒九卿四川資縣人由恩貢知平順縣鋤強去囊崇儒重道以丁艱回籍

文運衡三水舉人知黎城縣嚴毅公正事皆得體尤能轉移風氣升昌平知州終衛輝府知府至今稱廉明者必曰文公徐明揚浮梁人以貢知平順縣流寇來犯或以城小無備乞避之明揚不可設策守禦城破不屈死

侯君昭爲汾州知府崇禎末城破不屈死

仇秉忠歙縣人以貢知永甯州學政俱優招撫流移勤課士子升杭州同知有去思碑

楊學程漢中舉人任永甯州知州天資明敏遇事洞見本末吏民畏服後擢成都同知去民立祠祀焉

費甲鎡咸甯舉人先宰平遙有善政遂調汾陽平人老穉扳

轅立去思碑泣汾端方不阿權貴時流寇蔓延巡撫許鼎臣以曹文詔軍平定備太原東太監閻思允同總兵張應昌軍汾州備太原西賊至彰德應昌等出兵進勦甲鏹爲閭所逼投井死宗紳士庶皆枕尸哭劉太監聞之抗疏白其冤

魏錫祚固原人臨縣知縣臨先爲寇陷雖經新復餘孽猶間起錫祚撫養殘黎以身捍衛凡五年盜靖民安治行最著後致政歸士民攀轅泣送數十里不絕建祠祀之

楊家龍字惕若曲陽人由歲貢生任甯鄉知縣民遭兵亡徙過半撫之七年皆復業以薦遷忻州知州受事甫數旬賊卽至召諸士民曰此城必不守吾出若輩可全也挺身出城罵賊而死士民祠祀之

王凝命昆明人進士知平遙縣造大礮建學宮禱雨立應處

已廉潔歷升蘄州道

劉必達汾陽知縣城破死之義勇范奇芳亦自到

黃圖昌字九如沂州進士崇禎中任澤州知州徵收賦役有以美投者榜示之悉抵次限正供課士論文甲乙纖毫不爽又捐俸建魁樓於異地庚午州雋五人元亦出屬縣論者咸歸功焉尋以艱去士民泣送百餘里不絕云

楊鎮原字中岳陳州人知陽城縣爲治簡穆行所無事壬申秋賊犯邑東募壯勇斬獲甚眾旣而賊益剽掠客兵往來如織且疫頻仍鎮原剗羅城葺垣牆築砦堡整保甲集器械火礮給糧糗芻茭施醫藥至醫家業以佐軍建樓於城西北晝夜寢處其中與寇遇相終始擢戶科給事中民立祠祀焉邑太宰張慎言撰碑記累遷河東道左參議卒葬邑南壇側

民歲時祀之知縣項龍章又加封樹云

焦鰲以貢士任沁水縣知縣流寇自晉入豫自豫返晉沁水實當其衝督士民嬰城固守力屈死之

程良球黃岡人崇禎間以舉人知渾源州申革草商除民大害以憂去士民戴之

馬剛中字九如商城人進士授大同知縣行取入都上臨軒策試授檢討十四年二月賊陷商城大罵磔死

蔣秉采字衷白全州人知靈邱縣七年八月募兵守城合門殉之守備于世奇把總陳彥武馬如身典史張標教諭路登甫胥鬬死贈卹如制

崔廓任邱舉人知懷仁縣條編官租成熟起課民免包賠至今永賴

楊士英西平人爲懷仁知縣後賊陷西平死之子婦王亦死  
李倬山陰知縣流賊至死之

李呈章信陽州人崇禎中知遼州五年紫金梁來寇拒守力  
屈城陷死之

李嘉會鄆城人以貢知榆社縣端方有守吏才明決政務寬  
仁常以化誨平兩造之情有循吏風

杜佇靜海人以貢知榆社縣爲政得寬猛之宜視國如家士  
民勒石頌德

馮道亨甯靜人貢生知榆社縣臨民以寬尤善育材人立祠  
祀之

范禎交趾人沁州判官征剿有功升本州知州薄賦緩刑懷  
遺澤者厯久不忘

范廷輔號鷲猗山東滋陽人以舉人任沁源縣性直才敏以清慎著稱時流寇猖獗因於城西紫金山建堡爲犄角孔聞讎曲阜人至聖裔以舉人知沁源縣正直不阿清廉自矢緩征以紓民困鋤暴以格奸豪保城定亂功績甚偉民立祠祀之

余一鳳龍游人崇禎間以舉人知武鄉縣丰格修整才識敏練分較鄉閭一時號稱得人

崔從教潞安人以貢任太原崇禎間巡撫宋統殷勦流賊檄之司餉隨署河曲縣事時城甫下路將李春芳縱兵大掠爲力禁得止又念賊病渴潰城恐賊亦以渴制我遂建議築水城兵荒後飢疫大行請振蠲租全活甚眾河曲民德之

秦樂天三原進士知河曲縣時當兵燹際士庶一日數驚樂



天百計撫綏申築水城尤加意學校升戶部主事

王濤字濟仲崑山人萬厯末舉於鄉以教諭擢解州知州補  
隨州崇禎十年正月賊至死尤烈贈太常少卿與蔡懋德並

祀雙忠祠

閻堯年隆平人以選貢任解州知州性廉潔雅習庶務遇事  
洞見本末務持公正後官苑馬寺卿祀名宦

袁葵東明人以進士任夏縣知縣有幹濟才勤于政事未踰  
年化行恩浹調淇洞祀名宦

湯維新濟甯進士知平陸縣性方正以廉潔自矢勤于撫綏  
有循吏遺風後入覲行囊蕭然祀名宦

房之屏宛平舉人任安邑知縣流賊陷城北向拜天子入署  
拜母命妻子各自盡投井未死賊曳出斬之

周培忠興平人崇禎七年知隰州當流寇陷城之後荒蕪滿目民私祝曰必得一清如水者來官此地可保萬全培忠至如民願培養元氣萬民復業

以上崇禎時

右明嘉靖至崇禎四百二十六人

山西通志卷一百八